

Prilog:

**PRIJEDLOZI ZAKLJUČAKA TIJEKOM RASPRAVE O INFORMACIJI
PREDSJEDATELJA VIJEĆA MINISTARA BiH O POSLJEDICAMA PRIRODNE
NESREĆE U BiH**

PRIJEDLOG ZAKLJUČKA POSLANIKA MIRSADA MEŠIĆA:

Zadužuje se Vijeće ministara BiH da osigura sredstva za popravke helikoptera Oružanih snaga BiH (OS BiH), kako bi se I i II helikopterski skvadron OS BiH potpuno osposobio za efikasno provođenje mjera zaštite i spašavanja ljudi i materijalnih dobara, te za ostale obaveze OS BiH.

PRIJEDLOZI ZAKLJUČAKA KLUBA POSLANIKA SDS-a:

Predstavnički dom PSBiH formira istražnu komisiju za utvrđivanje eventualnih propusta institucija u zakonu predviđenom roku za preventivno djelovanje protiv poplava, tokom i nakon poplava. Komisija ima šest članova-predstavnika političkih partija, a rok za podnošenje izvještaja (mandat komisije) je 20. juli 2014. godine. Komisija neće imati naknade za rad.

Na osnovu zaključka sa 14. sjednice Predstavničkog doma PSBiH, da Ministarstvo finansija i trezora BiH vrati sredstva Srpskoj demokratskoj stranci (SDS) u iznosu od 540.337 KM koja su na posebnom računu u skladu sa Odlukom visokog predstavnika. Predstavnički dom PSBiH zahtjeva od Ministarstva finansija i trezora BiH da hitno realizuje ovaj zaključak jer je SDS donijela odluku da ova sredstva uplati kao pomoć ugroženim od poplava.

Zadužuje se Savjet ministara BiH da u roku od 15 dana PSBiH po hitnoj proceduri dostavi Prijedlog izmjena i dopuna Zakona o Budžetu institucija BiH i međunarodnih obaveza BiH za 2014. godinu kojima se:

- a) preneseni višak sredstava neutrošenih za kapitalne investicije iz prethodnih godina i tekuća rezerva usmjeravaju na poseban račun namijenjen za pomoć poplavljenim područjima
- b) smanje rashodi gdje god je to moguće, a sredstva prebacuju na poseban račun namijenjen za pomoć poplavljenim područjima i to na način:
 - budžet korisnika koji je uvećan u odnosu na 2013. godinu vraća se na nivo iz 2013. godine
 - obustavljaju se kapitalne investicije (nabava građevina i opreme) planirane u ovoj godini i pokrenute procedure koje nisu u fazi realizacije (još nisu

sklopljeni ugovori), a sredstva se usmjeravaju na poseban račun namijenjen za pomoć poplavljenim područjima

- vrši racionalizacija planiranih nabavki, rashoda za putne troškove i ta sredstva usmjeravaju se na poseban račun namijenjen za pomoć poplavljenim područjima

Zadužuje se Savjet ministara i sve institucije u BiH da u roku od 15 dana van snage stave odredbe svih pravilnika i drugih akata kojima se određuju naknade za rad u upravnim i nadzornim odborima, komisijama i drugim tijelima, te da se uredi da članovi ovih tijela imaju pravo samo na putne troškove i dnevnicu za dan kada su radili u tijelu. Tako ušteđena sredstva usmjeravaju se na poseban račun namijenjen za pomoć poplavljenim područjima.

Zadužuje se Savjet ministara BiH da u Interresornu radnu grupu za pripremu prijedloga kriterijuma za raspodjelu pomoći BiH imenuje i jednog predstavnika Saveza opština i gradova Republike Srpske i jednog predstavnika Saveza opština i gradova Federacije BiH.

Zadužuje se Savjet ministara BiH da svako 60 dana informira PSBiH o prikupljanju i raspodjeli donatorskih i drugih sredstava namijenjenih za sanaciju šteta od poplava.

Predstavnički dom PSBiH poziva Upravu za indirektno oporezivanje BiH i Tužilaštvo BiH da hitno reagiraju i poduzmu sve mjere kako bi se naplatilo 300 miliona KM neplaćenog PDV-a i carina (stari dug).

PRIJEDLOG ZAKLJUČKA POSLANIKA SLAVKE JOVIČIĆA:

Poslanici Predstavničkog doma PSBiH do kraja mandata odriču se naknade za rad u stalnim, privremenim i ad hok komisijama PSBiH. Sredstva prikupljena na ovaj način uplaćuju se na poseban račun Ministarstva finansija i trezora BiH za pomoć stanovništvu i područjima pogođenim prirodnim nesrećom koja je zadesila BiH.

PRIJEDLOZI ZAKLJUČAKA POSLANIKA DENISA BEĆIROVIĆA:

Predstavnički dom PSBiH upućuje izraze sućuti porodicama nastradalih tokom prirodne nesreće u BiH.

Predstavnički dom PSBiH izražava zahvalnost svim pojedincima, organizacijama i institucijama koje su za vrijeme prirodne nesreće pomagali ugroženom stanovništvu.

Predstavnički dom PSBiH iskazuje posebnu zahvalnost stranim državljanima, međunarodnim organizacijama i institucijama sistema, koje u ovim teškim vremenima moraju biti posebno stavljene u službu obnove poplavom i klizištima opustošene zemlje.

Predstavnički dom PSBiH poziva sve političke snage u državi da se u potpunosti okrenu radu u institucijama sistema, koje u ovim teškim vremenima moraju biti posebno stavljene u službu obnove poplavom i klizištima opustošene zemlje.

Predstavnički dom PSBiH poziva sve nivoe vlasti u BiH da urade rebalanse budžeta koji će preusmjeriti što je moguće više iznosa sredstava u funkciju obnove države.

Predstavnički dom PSBiH poziva Evropsku uniju da iskaže solidarnost i razumijevanje prema BiH koju je pogodila do sada nezapamćena prirodna nesreća, te da BiH u procesu pružanja pomoći tretira kao državu sa kandidatskim statusom.

Predstavnički dom PSBiH podržava nastojanja da se u što skorije vrijeme organizira međunarodna donatorska konferencija za obnovu područja pogođenih prirodnom nesrećom i u tom smislu daje podršku Ministarstvu vanjskih poslova BiH i drugim ministarstvima BiH da nastave pregovore sa brojnim međunarodnim institucijama s ciljem pripreme navedene konferencije.

Predstavnički dom PSBiH traži od Vijeća ministara BiH da najkasnije u roku od 30 dana sačini i dostavi informaciju o slučajevima neosnovanog podizanja cijena, naročito osnovnih životnih namirnica i sanitarnih potrepština, za vrijeme prirodne nesreće u BiH, kao i o poduzetim mjerama nadležnih organa vlasti.

Predstavnički dom PSBiH traži do nadležnih organa vlasti da, ne remeteći sigurnosne procedure, pojednostave proces dopremanja humanitarne pomoći za građane ugroženih područja i otklone birokratske probleme koji se pojavljuju tokom njenog dopremanja iz inozemstva.

Predstavnički dom PSBiH posebno pohvaljuje angažman Oružanih snaga BiH na odlučnosti i hrabrosti iskazanoj u akcijama evakuacije i spašavanja stanovništva iz najugroženijih područja.

Predstavnički dom PSBiH poziva sve nivoe vlasti u BiH da tokom zbrinjavanja stanovništva, pored ostalog, posebno obrate pažnju na potrebu nabavke sljedećih stavki:

- pumpe velikog kapaciteta za ispumpavanje, male pumpe (prenosne) i isušivači
- lijekovi za ljude (različite namjene)
- lijekovi za domaće životinje (različite namjene)

- hemikalije, oprema za DDD i higijenska sredstva
- hrana za domaće životinje
- adekvatna (namjenska) vozila za transport lešina uginulih životinja
- gorivo za radnu i transportnu mehanizaciju
- gorivo za letjelice za zaprašivanje
- žitarice za ishranu kao i sjemenski poljoprivredni materijal (sjemenje kukuruza, pšenice i drugih žitarica)

PRIJEDLOG ZAKLJUČKA POSLANIKA SENADA ŠEPIĆA:

Predstavnički dom PSBiH zahvaljuje svima koji su, na bilo koji način, pomogli građanima koji su pogođeni poplavama i prirodnim nesrećama. Posebnu zahvalnost Predstavnički dom PSBiH iskazuje građanima BiH koji su nesebično pomogli i pomažu svojim komšijama i unesrećenima u BiH, bez obzira na etničku i nacionalnu pripadnost i činjenicu da dolaze sa prostora drugih općina, kantona i entiteta.

PRIJEDLOG ZAKLJUČKA POSLANIKA ŠEFIKA DŽAFEROVIĆA:

Zadužuje se Vijeće ministara BiH da hitno sačini i Predstavničkom domu PSBiH dostavi informaciju o elementarnim nepogodama u BiH iz maja 2014. godine, te predloži mjere za otklanjanje posljedica tih nepogoda.

PRIJEDLOZI ZAKLJUČAKA POSLANICE DUŠANKE MAJKIĆ:

Radi ublažavanja posljedica elementarnih nepogoda-poplava po stanovništvu u BiH, usvojeni su i sljedeći zaključci kojima se Savjet ministara BiH obavezuje da u najkraćem roku razmotri mogućnost i predloži odgovarajuća rješenja kojima će se postići sljedeće:

- da u parlamentarnu proceduru uputi Prijedlog izmjene Zakona o Budžetu institucija BiH i međunarodnih obaveza BiH za 2014. godinu kojim će se omogućiti promjena namjene određenih stavki budžeta BiH za 2014. godinu (sredstva namijenjena rješavanju pitanja izbjeglog i raseljenog stanovništva kao i svi planirani grantovi za koje nisu otpočele tenderske procedure-staviti u funkciju ublažavanja posljedica elementarnih nepogoda po stanovništvo u BiH)
- da se od Saudijske Arabije hitno zatraži saglasnost za promjenu namjene doniranih sredstava u visini 15 miliona USD (umjesto za pomoć izbjeglim i raseljenim licima-za ublažavanje posljedica elementarnih nepogoda u BiH)

- da se analiziraju i sva druga sredstva budžeta a za 2014. godinu koja se mogu iskoristiti u ove namjene, a koja neće uticati na normalno funkcioniranje institucija BiH

-

PRIJEDLOG ZAKLJUČKA POSLANIKA BOŠKE TOMIĆA:

Predlažema da u skladu sa članom 17. Zakona o Budžetu institucija BiH i međunarodnih obaveza BiH, Savjet ministara BiH donese odluku o prestruktuiranju rashoda unutar ukupnog iznosa odobrenog budžeta u svim institucijama i sredstva usmjeri za sanaciju nastalih šteta od poplava i klizišta na nivou BiH.

PRIJEDLOZI ZAKLJUČAKA PRVOG DOPREDSJEDATELJA ZASTUPNIČKOG DOMA PSBiH BOŽE LJUBIĆA:

Imajući u vidu kako je u tijeku realizacija velike donacije iz NR Kine koja se sastoji od poljoprivrednih strojeva (180 trakora, 40 motokultivatora, motornih pila itd.) predlaže se da Zastupnički dom zaduži Vijeće ministara BiH, odnosno nadležno Ministarstvo za ljudska prava i izbjeglice BiH da navedenu donaciju iz NR Kine u cjelosti usmjeri na područja pogođena poplavama i područjima na kojima je došlo do pojave klizišta, a sukladno potrebama i usvojenim kriterijima koje će Vijeće ministara usvojiti.

Predlaže se da Vijeće ministara BiH, a sukladno odredbama Zakona o proračunu institucija BiH pripremi i predloži izmjene i dopune Proračuna za 2014. godinu u cilju osiguranja dijela sredstava koja bi bila korištena za otklanjanje posljedica ove elementarne nepogode.

Potrebno je da Vijeće ministara BiH predloži mjere kao pomoć poduzećima u područjima koja su pogođena ovim katastrofalnim poplavama u cilju održanja proizvodnje i očuvanja radnih mjesta.

Predlaže se da svi zaključci koji su rezultat rasprave ili koji su predstavljeni od stranke zastupnika i klubova zastupnika u Zastupničkom domu PSBiH upute Vijeću ministara BiH koje ih treba analizirati i sublimirati u cjelovite mjere usmjerene k otklanjanju posljedica ove prirodne nesreće.

PRIJEDLOG ZAKLJUČKA ZASTUPNIKA MLADENA IVANKOVIĆA-LIJANOVIĆA

Zadužuje se predsjedatelj Vijeća ministara BiH da, zajedno sa entitetskim premijerima i ministrima poljoprivrede entiteta, žurno stave u funkciju platni sustav u poljoprivredi i ruralnom razvoju za BiH, kako bi BiH mogla koristiti pretpristupna sredstva EU-a za ruralni razvoj.

PRIJEDLOZI ZAKLJUČAKA POSLANIKA AZRE HADŽIAHMETOVIĆ I BERIZA BELKIĆA

Zadužuje se Vijeće ministara BiH da sve aktivnosti na novom zaduživanju kod međunarodnih finansijskih institucija usmjeri na saniranje posljedica i smanjenje rizika od elementarnih nepogoda izazvanih poplavama i klizištima u BiH

Vijeće ministara će, u saradnji sa nižim nivoima vlasti u BiH, napraviti listu prioriteta koja će biti osnova za realizaciju aktivnosti na novom vanjskom zaduživanju BiH.

Zadužuje se Fiskalno vijeće da razmotri potrebe izmjene budžeta BiH i pripremi novi srednjoročni fiskalni okvir, vodeći računa o značajnom padu ekonomske aktivnosti u BiH kao posljedici elementarnih nepogoda koje su zadesile BiH i naglašenim potrebama budžetske pomoći u funkciji saniranja posljedica poplava i klizišta u BiH.

Zadužuje se Vijeće ministara BiH da pripremi prijedloge izmjena postojećih zakona kojima se osiguravaju sredstva u budžeta institucija BiH i međunarodnih obaveza BiH i koji su osnov za finansiranje rashoda, kako bi se osigurala dodatna sredstva u funkciji saniranja posljedica elementarnih nepogoda u BiH.

Zadužuje se Vijeće ministara BiH da, u koordinaciji sa nadležnim institucijama u BiH, osigura transparentan način upravljanja sredstvima pomoći BiH kako bi se smanjili rizici od eventualnih zlouporaba.

Pozivaju se političke stranke da sredstva namjenja predizbornoj kampanji, a naročito ona namjenjena štampanju bilborda, plakata i drugih reklamnih materijala, uplate na račun namjenjen prikupljanju sredstava za pomoć stanovništvu stradalom u poplavama i klizištima u BiH.

PRIJEDLOZI ZAKLJUČAKA POSLANIKA MIRSADA ĐUGUMA:

Predlaže se da ministar civilnih poslova BiH, gospodin Sredoje Nović:

1. **HITNO** formira ekspertni/stručni tim za prevenciju, praćenje zaraznih oboljenja u BiH i posljedica katastrofalnih poplava u BiH, kao i koordinaciju sa Svjetskom zdravstvenom organizacijom i drugim međunarodnim organizacijama. Tim bi imao ulogu:
 - planiranje, analizu i monitoring za sprovođenje aktivnosti za sprječavanje i nadzor zaraznih bolesti u BiH
 - koordinacija sa entitetskim ministarstvima zdravstva i Odjelom za zdravstvo Brčko distrikta BiH u cilju planiranja i provođenja mjera za sprječavanje zaraznih oboljenja i pružanja adekvatne zdravstvene zaštite stanovništvu

- analiza kratkoročnih i dugoročnih uticaja i posljedica poplava na zdravstveni sistem i zdravlje stanovništva
- koordinacijsku ulogu sa Svjetskom zdravstvenom organizacijom i drugim organizacijama koje pružaju ekspertnu pomoć i pomoć u medicinskim sredstvima, lijekovima i vakcinama
- koordinacija i kontrola humanitarne pomoći koje se doprema u lijekovima, medicinskim sredstvima i vakcinama

Informacija o radu ekspertnog tima dostavljati sedmično u Vijeće ministara BiH, entitetska ministarstva i Odjel za zdravstvo Brčko distrikta BiH.

2. Da Ministarstvo civilnih poslova BiH **HITNO**, u roku od 30 dana, izradi Strategiju razvoja zdravstvenog sistema BiH i istu uputi Vijeću ministara BiH u proceduru usvajanja.

Obrazloženje: Strategija neophodna kako bi se mogla koristiti grant sredstva i sredstva iz IPA fondova EU-a, a koja će u narednom razdoblju biti neophodna zdravstvenom sustavu BiH, imajući u vidu dodatna opterećenja sustava uzrokovana poplavama.

PRIJEDLOG ZAKLJUČKA ZASTUPNIKA NIKE LOZANČIĆA:

Obvezuje se Vijeće ministara BiH da žurno, a najkasnije u roku od 24 sata, osigura funkcioniranje Koordinacijskog vijeća uspostavljenog sukladno Okvirnom zakonu o zaštiti i spašavanje ljudi i materijalnih dobara od prirodnih ili drugih nesreća u BiH, kao i donošenje nužnih odluka sukladno odredbama istoga Zakona.